

Lista de espera cirúrxica

Expediente: I.5.Q/12520/22

Santiago de Compostela, 17 de xaneiro de 2023

Sr. conselleiro:

Nesta institución iniciouse expediente de queixa como consecuencia do escrito de dona XXX, respecto da lista de espera por unha ciruxía de hernia cervical.

ANTECEDENTES

Nesa queixa expoñía o seguinte:

“Hago esta queja en nome de mi madre ya que ella no sabe hacer estos trámites. Mi madre lleva 1 año y 5 meses de baja debido a una hernia discal en el cuello. Está en lista de espera para operar desde abril y actualmente tiene las pruebas pertinentes hechas (electro, anestesia, etc).

Resumiendo, querría si pudiesen acelerar la operación de mi madre (que sería en el Hospital clínico de Santiago)”.

Ante iso requirimos, como vostede sabe, información á Consellería de Sanidade. No informe achegado por dito órgano, indícase o seguinte:

En relación á queixa presentada informo que a paciente foi incluída en lista de agarda cirúrxica o 05/05/2022, con Prioridade 3.

Consultado o Xefe de Servizo de Neurocirurxía sobre a situación da paciente respecto á lista de agarda cirúrxica, podemos indicar que a paciente será programada en atención á prioridade asignada, a súa antigüidade en lista de agarda, e en función dos recursos dispostos, sen poder concretar unha data a día de hoxe.

Non existen datos nin información na súa Historia Clínica que fagan pensar nunha necesidade de priorización.

ANÁLISE

Á vista do contido do escrito de queixa, da documentación achegada pola persoa que promoveu este expediente e do que se manifesta no informe da administración, cómpre facer as seguintes consideracións:

PRIMEIRA. A nai da interesada está pendente dunha intervención de hernia cervical e figura incluída na lista de agarda desde o día 5 de maio de 2022. No texto da queixa a interesada explica as dificultades que lle supón para o traballo debido á dor e limitación de mobilidade.

Informa a Administración que a paciente foi incluída na lista de agarda como *prioridade 3* e, xa que logo, a intervención será programada en atención a dita prioridade sen que se pudiera concretar unha data aproximada para ser operada.

SEGUNDA. As listas de agarda son a expresión da tensión existente entre a demanda de servizos sanitarios e a posibilidade de que esta sexa atendida de inmediato cos recursos existentes. Son un elemento común en todos os sistemas sanitarios públicos e universais. Con todo, a responsabilidade das administracións é prestar unha atención de calidade aos cidadáns.

O sistema sanitario público ten a obriga de garantir, non só o contido nominal e funcional das prestacións, senón tamén a forma de obtención das mesmas no referente a tempo e accesibilidade.

Co fin de alcanzar un tratamento homoxéneo das listas de espera de intervencións cirúrxicas correspondentes aos centros e servizos do Sistema Nacional de Saúde, aprobouse o Real Decreto 605/2003, do 23 de maio, polo que se establecen medidas para o tratamento homoxéneo da información sobre as mesmas. No seu artigo 4.2 sinala que “Cada cidadán terá acceso á información personalizada sobre a espera prevista en relación co seu proceso asistencial, que será proporcionada polo seu servizo de saúde”

CONCLUSIÓN

Por todo o sinalado ata agora considerase necesario, en aplicación do disposto no artigo 32.1 da Lei 6/1984, do 5 de xuño, do Valedor do Pobo, facer chegar a esa Consellería a seguinte **suxestión:**

Que se informe aos pacientes, e así se faiga neste caso, da súa situación en lista de espera cirúrxica con indicación, cando menos aproximada, do período de tempo no que previsiblemente levará a cabo a súa intervención cirúrxica.

Intensificar as medidas adoptadas para reducir a demora existente e que os tempos de espera sexan razoables.

Agradézolle de antemán a acollida ao manifestado nesta resolución da Valedora do Pobo, e recórdolle a necesidade de que no prazo dun mes (art. 32.2), dea conta a esta Institución da aceptación da recomendación formulada, de ser o caso, e das medidas adoptadas para darlle efectividade, tamén se é o caso.

Ademais, facémoslle saber que, en aplicación do principio de transparencia, a partir da semana seguinte á data na que se ditou a presente resolución, esta incluírase na páxina web da institución.

O principio de publicidade das resolucións desta institución refórzase no artigo 37 da Lei 6/1984, cando prevé que a Valedora do Pobo, no seu informe anual ao Parlamento de Galicia, dará conta do número e tipos de queixa presentadas; daquelas que foron rexeitadas e as súas causas, así como das que foron obxecto de investigación e o seu resultado, con especificación das suxestións ou recomendacións admitidas pola administración pública galega.

Saúdoo atentamente.

María Dolores Fernández Galiño
Valedora do Pobo